

登  
科  
記  
考

登科記考卷二十九

大興徐松

別錄中

昔三代建侯與今事異理道損益請自漢言之漢朝用人自詔舉之外其府寺郡國屬吏皆令自署故天下之士修身於家而辟書交至以此士務名節風俗用修魏氏立九品之制中正司之於是族大者第高而寒門之秀屈矣國朝舉選用隋氏之制歲月既久其法益訛夫才智因習而就固然之理進士者時其貴之主司褒貶實在詩賦務求巧麗以此爲賢不唯無益於用實亦妨其正習不唯撓其淳和實又長其佻薄自非識度超然時或孤秀其餘溺

於所習悉昧本源欲以啟導性靈獎成後進斯亦難矣故士林鮮  
體國之論其弊一也又人之心智蓋有涯分而九流七略書籍無

窮主司徵問

一作問目

不立程限故修習之時但務鈔略比及就試偶

中是期業無所成固由於此故當代寡人師之學其弊二也疏以  
釋經蓋筌蹄耳明經讀書勤苦以甚既口問義又誦疏文徒竭其  
精華習不急之業而當代禮法無不面牆及臨人決事取辨胥吏  
之口而已所謂所習非所用所用非所習者也故當官少稱職之  
吏其弊三也舉人大率二十人中方收一人故沒世而不登第者  
甚眾其事難其路隘也如此而雜色之流廣通其路也此一彼十

此百彼千揆其秩序無所差降故受官多底下之人修業抱後時之嘆待不才者何厚處有能者何薄崇本抑末啟昏窒明故士子舍學業而趨末伎其弊四也收人既少則爭第急切交馳公卿以求汲引毀譽同類用以爭先故業因儒雅行成險薄非受性如此勢使然也浸以成俗虧損國風其弊五也大抵舉選人以秋初就路春末方歸休息未定聚糧未辦卽又及秋正業不得修習益令藝能淺薄其弊六也羈旅往來糜費實甚非唯妨闕正業益亦廢其舊產未及數舉索然已空其弊七也貧窶之士在遠方欲力赴京師而所冀無際以至揆度遂至沒身使茲人有抱屈之恨國家

有遺才之闕其弊八也官司運江淮之儲計五費其四乃達京邑  
芻薪之費又十倍四方而舉選之人每年攢會計其人畜蓋將數  
萬無成而歸十乃七八徒令關中煩耗其弊九也爲官擇人唯才  
是待今選司並格之以年數合格者判雖下劣一切皆收如未台  
格而應科目者纔有小瑕莫不見弃故無能之士祿以例臻才俊  
之流坐成白首此非古人求賢審官之義亦已明矣其弊十也選  
人不約本州所試悉令聚於京師人旣浩穰文簿繁雜因此偷濫  
其事百端故俗閒相傳云入試非正身十有三四赴官非正身十  
有三此又弊之尤者今若未能頓除舉選以從古制且稍變易

以息弊源則官多佳吏風俗可變其條例如後謹議

趙匡舉  
議

一立身入仕莫先於禮尙書明王道論語首百行孝經德之本學者所宜先習其明經通此謂之兩經舉論語孝經爲之翼助諸試帖一切請停唯令策試義及口問其策試自改問時務以來經業之人鮮能屬綴以此少能通者所司知其若此亦不於此取人故時人云明經問策禮試而已所謂變實爲虛無益於政今請令其精習試策問經義及時務各五節並以通四以上爲第但令直書事義解釋分明不用空寫疏文及務華飾其十節總於一道之內問之餘科准此其口問諸書每卷問一節取其心中了悟解釋分

明往來問答無所滯礙不用要令誦疏亦以十分通八以上爲第  
諸科亦准此外更通周易毛詩名四經舉加左氏春秋爲五經舉  
不習左氏者任以公羊穀梁代之其但習禮記及論語孝經名一  
經舉旣立差等隨等授官則能否區分人知勸勉 一明法舉亦  
請不帖但策問義并口問准經業科 一學春秋者能斷大事其  
有兼習三傳參其異同商榷比擬得其長者謂之春秋舉策問經  
義并口問並准前 一進士習業亦請令習禮記尙書論語孝經  
并一史其雜文請試兩首共五百字以上六百字以下試箋表論  
議銘頌箴檄等有資於用者不試詩賦其理通其詞雅爲上理通

詞平爲次餘爲否其所試策於所習經史內徵問經問聖人旨趣  
史問成敗得失并時務其十節貴觀理識不用徵求隱僻詰以名  
數爲無益之能言詞不至陋鄙卽爲第一其有通禮記尙書論  
語孝經之外更通道德諸經通元經孟子荀卿子呂氏春秋管子  
墨子韓子謂之茂才舉達觀之士旣知經學兼有諸子之學取其  
所長捨其偏滯則於理道無不該矣試策問諸書義理并時務其  
二十節仍與之言論觀其通塞 一其有學兼經史達於政體策  
略深致其詞典雅者謂之秀才舉經通四經或二禮或三家春秋  
兼通三史以上卽當其目其試策經問聖人旨趣史問成敗得失



并時務共二十節仍與之談論以究其能 一學倍秀才而詞策  
同之談論貫通究議成敗謂之宏才舉以前三科其策當詞高理  
備不可同於進士其所徵問每十節通八以上爲第 一其史書  
史記爲一史漢書爲一史後漢書并劉昭所注志爲一史三國志  
爲一史晉書爲一史李延壽南史爲一史北史爲一史習南史者  
兼通宋齊志習北史者通後魏隋書志自宋以後史書煩碎冗長  
請但問政理成敗所因及其人物損益關於當代者其餘一切不  
問國朝自高祖下及睿宗實錄并貞觀政要共爲一史 一天文  
律歷自有所司專習且非學者卒能尋究並請不問唯五經所論

蓋舉其大體不可不知 一每年天下舉人來秋入貢者今年九月州府依前科目先起試其文策通者注等第訖試官本司官錄事參軍及長吏連押其後其口問者題策後云口問通若干卽相連印縫並依寫解爲先後不得參差封題訖十月中旬送觀察使觀察使差人送都省司隨遠近比類須合程限省司重考定訖其入第者二月內符下諸道諸州追之退九月內盡到到卽重試之其文策皆勘會書跡詞理與州試同卽收之僞者送法司推問其國子監舉人亦准前例 一諸色身名都不涉學昧於廉恥何以居官其簡試之時雖云試經及判其事苟且與不試同諸皆令習

孝經論語其孝經口問五道論語口問十道須問答精熟知其義理並須通八以上如先習諸經書者任隨所習試之不須更試孝經論語其判問以時事取其理通必在責其重保以絕替代其合外州申解者依舉選例處分 一一經及第人選日請授中縣尉之類判入第三等及蔭高授上縣尉之類兩經出身授上縣尉之類判入第三等及蔭高授緊縣尉之類用蔭止於此其以上當以才進四經出身授緊縣尉之類判入第三等授望縣尉之類五經授望縣尉之類判入第三等授畿縣尉之類明法出身與兩經同資進士及三禮舉春秋舉與四經同資其茂才秀才請授畿尉之

類其宏才請送詞策上中書門下請授諫官史官等禮經舉人若  
更通諸家禮論及漢以來禮儀沿革者請便授太常博士茂才等  
三科爲學既優並准五經舉人便授官其雜色出身人量書判授  
中縣尉之類判入第三等及蔭高者加一等凡蔭除解褐官外不  
在用限 一其今舉人所習既從簡易士子趨學必當數倍往時  
每年諸色舉人主司簡擇常以五百人爲大限此外任收雜色

趙

舉選人條例 選人條例不錄 選

有司或詰於議者曰吏曹所銓者四謂身言書判今外州送判則  
身言闕失如何對曰夫身言者豈非洪範貌言乎貌謂舉措可觀

言謂詞說合理此皆才幹之士方能及此今所試之判不求浮華但令直書是非以觀理識於此既蔽則無貌言斷可知矣書者非理人之具但字體不至乖越卽爲知書判者斷決百事眞爲吏所切故觀其判才可知矣彼身言及書豈可同爲銓序哉有司復詰曰王者之盛莫逾堯舜書稱敷納以言爲求才之通軌今以言爲後亦有說乎對曰夫敷納以言者謂引用賢良升於達位方將詢以庶政非言無以知之其唐虞官百者俞無幾下及小吏官長自求各行敷納事至簡易今吏曹所習輒數千人三銓藻鑑心目難溥酬喧競之不暇又何敷納之有乎其茂才以上學業旣優可以

言政教接以談論近於敷納矣有司復曰士有言行不差而闕於文學或頗有文學而言行未修但以諸科取之無乃未備對曰吏曹所銓必求言行得之既審然後授官則外州遙試未爲通矣今銓衡之下姦濫所萃紛爭劇於獄訟僞濫深於市井法固致此無如之何豈若外州先試兼察其行苟居宅所在則鄰伍知之官司耳目易爲采聽古之鄉舉里選方斯近矣且今之新法以學舉者一經畢收以判選者直書可否可謂易矣修言行者心當敦固不能爲此餘何足觀若有志性過人足存激勸及躬爲惡行不當舉用者則典章已備但舉而行之耳有司復曰其有効官公清且有

能政以其短於詞判不見褒升無乃闕於事實乎對曰苟能如此  
最爲公器使司善狀國有常規病在不行耳但令諸道觀察使每  
年終必有褒貶不得僭濫則善不蔽矣問曰試帖經者求其精熟  
今廢之有何理乎對曰夫人之爲學帖易於誦誦易於講今口問  
之令其講釋若不精熟如何應對此舉其難者何用帖爲且務於  
帖則於義不專非演智之術固已明矣夫帖者童穉之事今方授  
之以職而待以童穉於理非宜有司復曰舊法口問並取通六今  
令通八無乃非就易之義乎對曰所習者少當務其精止於通六  
失在鹵莽是以然耳復曰舉人試策例皆五通今併爲一有何理

乎對曰夫事尙實則有功徇虛則益寡試策五通多書問目數立  
頭尾徇虛多矣豈如一策之內併問之乎

趙匡舉  
選後論

王者官人必視國之要杜諸戶一其門安平則尊經術之士有難  
則貴介冑之臣夏殷周選士必於庠序非其道者莫得仕進是以  
誘人也無二其應之者亦一及周之末諸侯異政取人多方故商  
鞅患之說秦孝公曰利出一孔者王利出二孔者強利出三孔者  
弱於是下令非戰非農不得爵位秦卒以是能并吞六國漢室干  
戈以定禍亂貴尙滄實高后舉孝悌力田文景守而不變故下有  
常業而朝稱多士及孝武察孝廉置五經博士弟子雖門閥二三



而未失道德也逮至晚歲務立功名銳意四夷故權譎之謀設荆楚之士進軍旅相繼官用不足是以聚斂計料之政生設險興利之臣起番系嚴熊鼎等經管作渠以通漕運東郭偃孔僅建鹽鐵諸利策富者冒爵射官免刑除罪公用彌多而請官者徇私上下並求百姓不堪剗弊故巧法慘急之臣進而見知廢格之法作杜周滅宣之屬以峻文決理貴而王溫舒之徒以鷹擊敢殺彰而法先王之術習俎豆之容者無所任用由是精通秀穎之士不游於學游於學者率章句之儒也是以昭帝之時霍光問人疾苦不本之於太常諸生徵天下賢良文學以訪之是常道不足以取人也

至於東漢光武好學不能施之於政乃躬自講經肅宗以後時或  
祖效尊重儒術不達其意而酌其文三公尙書雖用經術之士而  
不行經術之道是以元成以降迄於東漢慷慨通方之士寡廉隅  
立節之徒眾無何漢氏失馭曹魏僭竊中正取士權歸著姓雖可  
以鎮伏眈庶非尙賢之術蓋尊尊之道於時聖人不出賢哲無位  
詩道大作怨曠之端也洎乎晉宋齊梁遞相祖習其風彌盛舍學  
問尙文章小仁義大放誕談莊周老聃之說誦楚詞文選之言六  
經九流時習閱目百家三史罕聞於耳撮羣鈔以爲學總眾詩以  
爲資謂善賦者廊廟之人雕蟲者台鼎之器下以此自負上以此

選材上下相蒙持此爲業雖名重於當時而不達於從政故曰取  
人之道可以敦化周書曰以言取人人竭其言以行取人人竭其  
行取人之道不可不慎也原夫詩賦之意所以達下情所以諷君  
上上下下情通而天下亂者未之有也近之作者先文後理詞治不  
雅既不關於諷刺又不足以見情蓋失其本又何爲乎隋氏罷中  
正舉選不本鄉曲故閭里無豪族井邑無衣冠人不土著萃處京  
畿士不飾行人弱而愚夫古者以勳賞功以才莅職以才莅職是  
以職與人宜近則以職賞功是以官與人乖古者計人而貢士計  
吏而用人故士無不官官無乏吏近則官倍於古士十於官求官

者又十於士故士無官

後魏羽林士今萬騎軍功是也

官之祿吏擾人古者王畿

千里千里之外封建諸侯之吏自卿以降各自舉任當乎漢室除保傅將相餘盡專之州縣佐史則皆牧守選辟夫公卿者主相之所任也甸外之官吏者又諸侯牧守之事也然則主司之所選者獨甸內之吏公卿府之屬耳豈不寡哉所選既寡則焉得不精近則有封建而無國邑五服之內政決王朝一命免拜必歸吏部按名授職猶不能遣何暇採訪賢良搜覈行能卽時皆共噬其失而不知失之所以故備詳之又曰夫官有大小材有短長長者任之以大官短者任之以小職職與人相宜而功與事並理是以孟公

綽爲趙魏老則優不可以爲滕薛大夫近之任官其選之也略其  
使之也備一人之身職無不莅若委游夏以政事責冉季以文學  
也何其謬歟故人失其長官失其理是以三代之制家有代業國  
有代官孔子曰醫不三世不服其藥史墨曰古之爲官代守其業  
朝夕思之一朝失業死則及焉是知業不代習則其事不精此周  
之所以得人也昔羲氏和氏掌天地劉氏代擾龍籍氏代司吏庾  
氏庫氏代司出納制氏代司鑄鐘卽其事也後代以代卿執柄益  
私門卑公室齊奪於田氏魯弱於三家革代卿之失而不復代業  
之制醫工筮數其道浸微蓋爲此也故老子曰聖人常善救人故

無棄人常善救物故無棄物不善用人者譬若使驥捕鼠令鷹守肉驥之捕鼠終不可獲而千里之功廢矣鷹之守肉死有餘罪而攫撮之效沒矣夫裁徑尺之帛刻方寸之木不任左右必求良工者裁帛刻木非左右之所能故也徑尺之帛方寸之木薄物也非良工不能裁之況帝王之佐經國之任可不審擇其人故構大厦者先擇木然後擇材理國家者先擇佐然後守人大匠構屋必以大材爲棟梁小材爲榱桷苟有所中尺寸之木無棄此善理木者也

劉秋選  
舉論

天王三京北都居一其風俗遠蓋陶唐氏之人歟襟四塞之要衝

控五原之都邑雄藩劇鎮非賢莫居則陽曲丞王公神仙之胄也  
爾其學鏡千古知周萬殊又若少府賈公以述作之雄也鼇弄筆  
海虎攫辭場又若石艾尹少公廊廟之器口折黃馬手揮青萍咸  
道貫於人倫名飛於日下實難沈屈永懷青霄劍有隱而氣衝七  
星珠雖潛而光照萬壑今年春皇帝有事千畝湛恩八埏大搜羣  
才以緝邦政而王公以令宰見舉賈公以王霸昇聞海激佇乎三  
千天飛期於六月必有以也豈徒然哉有從兄太原主簿舒才華  
動時規謀匠物乃黜翠幕筵虹梁瓊羞霞開羽觴電舉然後抗日  
遠覽憑軒高吟汾河鏡開漲藍都之氣色晉山屏列橫朔塞之郊

原屏俗事於煩襟結浮歡於落景俄而皓月生海來窺醉容黃雲  
出關半起秋色數君乃輟酌慷慨搖心促裝望丹闕而非遠揮玉  
鞭而且去白也不敏先鳴翰林幸叨玳瑁之筵敢竭麒麟之筆請  
各探韻賦詩寵行

李白秋日於太原南柵餞陽曲王贊公  
賈少公石艾尹少公應舉赴上都序

孟子以鄉舉秀才射策甲科二十年矣同時中楊葉者今或蔚爲  
六官亞卿或彤襜虎符秩二千石而孟子猶羸馬青袍客江潭閒  
遇與不遇何其寥賔也然君子不患貧患業不修不患位下患道  
不行孟子言忠信行篤敬好學工文令名藹然今茲入關有司之  
喜也諸公展相遇之禮其肯不以推之挽之爲己任見三月四月



之交澧澗之閒三雉飛鳴草木暢茂是吾子彈冠之時也二三子

不可以不賦

獨孤及送孟諤  
事赴上都序

彼馳騫乎士林者鮮不爭九流之勝負徇三川之聲利而張侯獨  
以善閉關乃知純白內充天機外朗則塵垢糠粃所不能入癸巳  
歲六月始以出處之道問仕於余予灑然曰今四表文明八紘屢  
頓此志士所當登秀造而取青紫不奮不躍如休明何由是罷琴  
高臺投竿舊浦單車匹馬是日西上君子以爲知幾吾見垂天之  
雲不復顧北溟矣盍使居者歌吾子乎

獨孤及送張諤  
赴舉入關序

計近代以來爵祿失之者久矣其失非他在四太而已何者入仕

之門太多代冑之家太優祿利之資太厚督責之令太薄請徵古制以明之管子曰夫利出一孔者其國無敵出二孔者其兵不誦出三孔者不可以舉兵出四孔者其國必亡先王知其然故塞人之養隘其利途使人無游事而一其業也而近代以來祿利所出數十百孔故人多歧心疏瀉漏失而不可轄也夫入仕者多則農工益少農工少則物不足物不足則國貧是以言入仕之門太多禮曰天子之元子士也天下無生而貴者則雖儲貳之尊與士伍同故漢王良以大司徒位免歸蘭陵後光武巡幸始復其子孫邑中徭役丞相之子不得蠲戶課而近代以來九品之家皆不征其

高蔭子弟重承恩獎皆端居役物坐食百姓其何以堪之是以言  
代胄之家太優先王制士所以理物也置祿所以代耕也農工商  
有經營作役之勞而士有勤人致理之憂雖風猷道義士伍爲貴  
其苦樂利害與農工商等不甚相遠也後代之士乃撞鐘鼓樹臺  
榭以極其歡而農工鞭背役筋力以奉其養得仕者如昇仙不  
仕者如沈泉歡娛憂苦若天地之相遠也夫上之奉養也厚則下  
之徵斂也重養厚則上覲其欲斂重則下無其聊故非類之人或  
沒死以趣上構姦以入官非唯求利亦以避害也是以言祿利之  
資太厚語曰陳力就列不能者止昔李膺周舉爲刺史守令畏憚

觀風投印綬者四十餘城夫豈不懷祿而安榮哉顧漢之法不可  
偷也自隋變選法則雖甚愚之人蠕蠕然第能乘一勞結一課獲  
入選敘則循資授職族行之官隨列拜揖藏俸積祿四周而罷因  
緣侵漁抑復有焉其罷之日必妻孥華楚僕馬肥腩而偃仰乎士  
林之閒及限又選終而復始非爲巨害至死不黜故里語謂人之  
爲官若死然未有了而倒還者爲官如此易享祿如此厚上法  
如此寬下斂如此重則人孰不違其害以就其利者乎是以言督  
責之令太薄旣濟以爲當輕其祿利重其督責使不才之人雖虛  
座設位置印綬於旁揖而進授之不敢受寬其征徭安其田里使

農商百工各樂其業雖以官誘之而莫肯易如此則規求之志不  
禁而息多士之門不扃而閉若上不急其令下不寬其徭而欲以  
法術遮列禁人奸冒此猶坏土以壅橫流也勢必不止夫古今選  
用之法九流常敘有三科而已曰德也才也勞也而今選曹皆不  
及焉何以言之且吏部之本存乎甲令雖曰度德居官量才授職  
計勞升秩其文具矣然考校之法皆在判書簿歷言詞俯仰之間  
侍郎非通神不可得而知之則安行徐言非德也麗藻芳翰非才  
也累資積考非勞也苟執此不失猶乖得人況眾流茫茫耳目有  
不足者乎蓋非鑒之不明非擇之不精法使然也先朝數人以下

言之詳矣是以文皇帝病其失而將革焉夫物盈則虧法久終弊雖文武之道亦與時張弛五帝三王之所以不相沿也是以王者觀變以制法察時而立政按前代選用皆州府察舉及年代久遠訛失滋深至於齊隋不勝其弊凡所置者多由請託故當時議者以爲與其率私不若自舉與其外濫不若內收是以罷州府之權而歸於吏部此矯時懲弊之權法非經國不刊之常典今吏部之法蹙矣復宜掃而更之無容循默坐守刑弊伏以爲當今選舉人未土著不必本於鄉閭鑒不獨明不可專於吏部謹詳度古制折量今宜謂五品以上及羣司長官俾宰臣進敘吏部得參議焉其

六品以下或僚佐之屬許州府辟用則銓擇之任悉委於四方結  
奏之成咸歸於一部必先擇牧守然後授其權高者先署而後聞  
卑者聽版而不命其牧守將帥或選用非公則吏部兵部得察而  
舉之聖王明目達聰選聽遐視罪其私冒不愼舉者小加譴黜大  
正刑典責成授任誰敢不勉夫如是則接名僞命之徒非才薄行  
之人貪叨賄貨懦弱姦宄下詔之日隨聲而廢通計大數十除八  
九則人少而員寬事詳而官審賢者不獎而自進不肖者不抑而  
自退除隋權道復古美制則眾才咸得而天下幸甚或曰當開元  
天寶中不易吏部之法而天下砥平何必外辟方臻於理旣濟以

爲不然夫選舉者經邦之一端雖制之有美惡而行之由於法令是以州郡察舉在兩漢則理在魏齊則亂吏部選集在神龍則紊在開元天寶則理當其時久承升平御以法術慶賞不軌威刑必齊由是而理匪用吏部而臻此也向以此時用辟召之法則其理不益久乎夫議事以制不以權當徵其本末計其遐邇豈時得時失之可言耶或曰帝王之都必浩穰輻輳土物繁合然後稱其大若權散郡國遠人不至則京邑索矣如之何又甚不然自古至隋數百千年選舉之任皆分郡國當漢文景武帝之時京師庶富百廛九市人不得顧車不得旋侈溢之盛亦云極矣豈待選舉之士



爲其助哉又夫人有定土土無贖人浮尤者多則地著者少自隋  
罷外選招天下之人聚於京師春還秋往鳥聚雲合窮關中地力  
之產奉四方游食之資是以筋力盡於漕運薪粒方於桂玉是由  
斯人索我京邑而謂誰索乎且權分州郡所在辟舉則四方之人  
無有遐心端居尊業而祿自及祿苟未及業常不廢若仕進外絕  
要攢乎京惜時懷祿孰肯安堵必貨鬻田產竭家贏糧糜費道路  
交馳往復是驅地著而安爲浮尤者也夫京師之尤孰與四方之  
實一都之繁孰與萬國之殷況王者當繁其天下豈屢問之中校  
其眾寡哉或曰仕門久開入者已眾若革其法則舊名常調不足

以致身使中才之人進無所容退無所習其將安歸乎既濟以爲人繫賢愚業隨崇替管庫之賢既可以入仕則士之不肖甯愧乎出流從古以然非一代也故傳云三后之姓於今爲庶今士流既廣不可强廢但鍵其舊門不使新人峻其宦途不使濫登十數年間新者不來而舊者耗矣待其人少然後省官夫人之才分各有餘裕自爲情欲所汨而未嘗盡焉引之則長縈之則短在勉而已故凡士族皆稟父兄之訓根聰明之性蓋以依依官緒無湮淪墊溺之虞故循常不修名義罕立此教使然也若惟善是舉不才決棄前見爵祿後臨塗泥人懷憤激孰不騰進則中品之人悉爲長

材雖曰慎選捨之何適

沈既濟  
選舉議

初國家自顯慶以來高宗聖躬多不康而武太后任事參決大政與天子並太后頗涉文史好雕蟲之藝永隆中始以文章選士及永清之後太后君天下二十餘年當時公卿百辟無不以文章因循遐久浸以成風以至開元天寶之中上承高祖太宗之遺烈下繼四聖理平之化賢人在朝良將在邊家給戶足人無苦窳四夷來同海內宴然雖有宏猷上略無所措奇謀雄武無所奮百餘年間生育長養不知金鼓之聲烽燧之光以至於老故大平君子唯門調戶選徵文射策以取祿位此行已立身之美者也父教其子

兄教其弟無所易業大者登臺閣小者任郡縣資身奉家各得其  
足五尺童子恥不言文墨焉是以進士爲士林華選四方觀聽希  
其風采每歲得第之人不浹辰而周聞天下故忠賢雋彥韜才毓  
行者咸出於是而桀奸無良者或有焉故是非相陵毀稱相騰或  
屬結鉤黨私爲盟歆以取科第而聲名動天下或鉤摭隱惡嘲爲  
篇詠以列於道路迭相談訾無所不至焉

沈既濟  
詞科論

一或曰按國家甲令凡貢舉人本求才德不選文詞故律曰諸貢  
舉非其人者徒注云謂德行乖僻者也居州郡則廉使昇聞在朝  
廷則以時黜陟用茲懲勸足爲致理有司因循不修厥職寢以訛

謬使其陵頽今但修舊令舉舊政則人服矣焉用改作答曰州郡以德行貢士禮闈以文詞揀才試官以帖問求學銓曹以書判擇吏俱存甲令何令宜修且惟德無形惟才不器博之弗得聆之弗聞非在所知焉能辨用今禮部吏部一以文詞貫之則人斯遠矣使臣廉舉但得其善惡之尤者耳每道累歲罕獲一人至如循常諄諄蚩駘愚鄙者或身甚廉謹政爲人蔽者或善爲姦濫秘不彰聞者一州數十人曷嘗聞焉若銓不委外任不責成不潔其源以道其流而以文字選士循資授職雖口誦律令手操斧鉞以臨其人無益也改之不可 一或曰昔後漢貢士諸生試經學文史牋

奏則舉人試文乃前王典故而子獨非於今何也答曰漢代所貢  
乃王官耳凡漢郡國每歲貢士皆拜爲郎分居三署儲才待詔無  
有常職故初至必試其藝業而觀其能否至於郡國僚吏皆府主  
所署板檄召用至而授職何嘗實貢亦不試練其選州陋邑一掾  
一尉或津官戍吏皆登銓上省受試而去者自隋而然非舊典也  
沈既濟選舉雜議  
按錄十條之二

文章之道取士其來舊矣或材不兼行然其得之者亦已大半故  
筮仕之目以東堂甲科爲美談潁川陳侯以色養力行之餘輒工  
詩賦長波清瀾浩浩不窮初未覲止也屯田柳郎中爲予言之且

誦其佳句曰地偏雲自起月暮山更深及獲其卷又有過於是者  
踈嘯嘯櫛干將恬然褰衣以否爲泰久矣今年秋驅車江濱獻賦  
京師叩予柴門惠然見別予以鄙略亦嘗志於文頃年迫知己之  
眷屏書官命故每客有爲卿大夫所薦舉計偕者其於餞輒或諗  
之以言今於陳侯猶前志也

權德輿送陳秀才應舉序

取士以孝秀二科古道也家有兼者時論多之君之羣從皆以文  
藻射策或致位郎署今孝廉又以溫清之餘力行居業業茂行修  
西遊太學吾知夫上第之後衣袵服吟舞雩東還南徐拜慶堂下  
粲粲門子經術發身占人有俯拾地芥之說斯濫觴矣

權德輿送獨孤孝廉

應舉序

古者採詩以辯志升歌以發德繫於時風播爲樂章有不類者君子羞之令兒能泝其末流泳於深源志之所之不遷於物以爲洙泗弟子起予者商而又嘉回之屢空鄙賜之屢中故帶經食力耕於汝山之下環堵蓬茨若蔭華棧逸韻麗藻鏘然在聽去歲臨汝守首賢能之書貢於儀曹瞻言正鵠審固則獲前此亦嘗失之矣遐實無愠羸而不竄蓋能反諸己而已且用廉賈之道故也今將抵洛郊厯平陽與賢諸侯交歡假道然後自洛之汝燕居中林磅礴古昔務諸遠大驚出幽谷鵬擊南溟將與羣從叔季復修異日



之賀豈止於今耶南宮郎有雅知兄者且與德輿爲僚徵詩貺別

以附其志謹序

權德輿送從兄南仲登科後歸汝州舊居序

清旭燕居有秀才鈕氏以儒者衣冠訪我於衡門之下用文一軸與刺偕至訪其行色則曰將抵賢二千石陸上饒然後自江而西射策上國且上饒以偉詞邁氣待東南之士士至必循分加禮繇是褻衣之徒恥不登其門故殿中韓侍御元直工爲直詞嘗貺若以序故臨海守李君子從父戶部皆以文藝風騷爲師友又貺若以詩矧夫植文行於內親仁賢於外強學不倦潔已以進今茲行也以桂林一枝爲己任豈虛也哉辱徵不腆是用詞達

權德輿送鈕秀才謁

信州陸員外

使赴舉序

益都有司馬揚王遺風生嘗薄游西南覽其江山頗奮文辭嘆蜀  
解嘲四子講德之式及夫秀士升貢有司處之以上第時輩歸之  
以高名飄飄然有排大風摩青天之勢今歲後四月謝諸朋游輕  
騎東出且以五綵之服拜慶於庭闈榮哉孝乎是往也予將與生  
爲五湖之游矣今則繫在柱下不能奮飛送歸如何爲媿爲羨大  
雅云敬慎威儀以近有德益雖有雜佩不如此詩輟而爲好以志  
少別

梁肅送韋十六進士及第後東歸序

自三閭大夫作九歌於是有激楚之詞流於後世其音清越其氣

淒厲吾友君貺者實能誦遺編吟逸韻所作詩歌楚風在焉初元  
之明年予與君貺兄洪俱參淮南軍事屬河外塵起羽書狎至每  
沈迷簿領之際一見夫人清揚則煩襟洗如也又常愛其人也澹  
然其靜也曠然其適也泛然其無不與也且從賓薦之禮以赴揚  
名之期又見其志也秋氣云暮蕪城草衰亭皋一望烽戍滿目邊  
馬數聲心驚不已感離別於茲辰限鄉關於遠道孰曰有情而不  
歎息傷時臨歧者得無詩乎

梁肅送元  
錫赴舉序

以明經舉者誦數十萬言又約通大義徵辭引類旁出入他經者  
又誦數十萬言其爲業也勤矣登第於有司者去民畝而就吏祿

由是進而累爲卿相者常常有之其爲獲也亦大矣然吾未嘗聞  
有登第於有司而進謝於其門者豈有司之待之也抑以公不以  
情舉者之望於有司也亦將然乎其進而謝於其門也則爲私乎  
抑無乃人事之未思或者不能舉其禮乎若牛堪者思慮足以及  
之材質足以行之而又不聞其往者其將有以哉違眾而求識立  
奇而取名非堪心之所存也由是而觀之若堪之用心其至于大  
官也不爲幸矣堪太學生也余博士也博士師屬也於其登第而  
歸將榮於其鄉也能無說乎

韓愈送  
牛堪序

伯樂之廐多良馬卞和之匱多美玉卓犖瓌怪之士宜乎游於大

人君子之門也相國龐西公既平汴州天子命御史大夫吳縣男  
爲軍司馬門下之士權生實從之來權生之貌固若常人耳其文  
辭引物運類窮情盡變宮商相宣金石諧和寂寥乎短章春容乎  
大篇如是者閱之累日而無窮焉愈常觀於皇都每年貢士至于  
餘人或與之游或得其文若權生者百無一二焉如是而將進於  
明有司重之以吳縣之知其果有成哉於是咸賦詩以贈之

韓愈  
送權

秀才  
序

今年秋見孟氏子瑄於郴年甚少禮甚度手其文一編甚鉅退披  
其編以讀之盡其書無有不能吾固心存而目識之矣其十月吾

道於衡潭以之荆累累見孟氏子焉其所與偕盡善人長者吾益以奇之今將去是而隨舉於京師雖不有請猶將彊而授之以就其志況其請之煩耶京師之進士以千數其人靡所不有吾常折肱焉其要在詳擇而固交之善雖不吾與吾將彊而附不善雖不吾惡吾將彊而拒苟如是其於高爵猶階而升堂又況其細者耶

韓愈送孟秀才序

讀書以爲學續言以爲文非以誇多而鬪靡也蓋學所以爲道文所以爲理耳苟行事得其宜出言適其要雖不吾面吾將信其富於文學也潁川陳彤始吾見之楊湖南門下頎然其長蕭然其和

吾目其貌耳其言因以得其爲人及其久也果若不可及夫湖南之於人不輕以事接爭名者之於藝不可以虛屈吾見湖南之禮有加而同進之士交譽也又以信吾信之不失也如是而又問焉以質其學策焉以考其文則何信之有故吾不徵於陳亦不出於我此豈非古人所謂可爲智者道難與俗人言者類耶凡吾從事於斯也久未見舉進士有如陳生而不如志者於其行姑以是贈之

韓愈送陳秀才彤序

居方足下承今冬以前明經赴調罷舉進士何顛且不沛逝而能復歟國家設尊官厚祿爲人民也爲社稷也在求其人非與人求

在得其人非與人得唯道德膺厥求唯賢能膺厥得賢能事事而後見道德誠誠而後信苟須事事苟須誠誠則必委以務命以職從而覈之四海之大億兆之眾不可逢而委命之是用啟稍異之開姑致其我樂而自耀者讀往載旣前言則曰明經屬以辭賦以事則曰進士中夫程度者取政事最輕小者命以始又令公侯子孫卿大夫子弟能力役供給者曰千牛進馬三衛齋郎限以年月終亦試之其有成則陟陟不已乃尊乃厚其有敗則黜黜不已乃戮乃亡取之於諸科暫殊用之於諸科則一良未卽以進士賢而明經不賢也況目覩進士出身十年二十年而終于一命者有之



明經諸色入仕須臾而踐卿相者有之忠與孝相生君與父相隨  
於家美卽於國良爲閨門重則爲朝廷尙此古昔聖賢絕慮萬不  
失一之得也僕忝居方交遊自貞元之初於今十有三祀熟得居  
方之爲人年纔弱冠行跡如此豈徒生哉得之以道爲美爲傳不  
得以道爲回爲憲時之令人豈不善歟

歐陽詹與  
鄭伯義書

諸侯歲貢俊才於天子故陳侯今年有觀光之舉白露蕭物青天  
始高雲迴鴻盤言遵永途吾觀夫雄心銳志將領能事則夷山堙  
谷不盡其力何東堂一枝南荆一片足塵其慮邪勉哉陳侯有其  
才奏其試知其成矣

歐陽詹送陳八  
秀才赴舉序

三折肱爲良醫予五升詞場四遭掎摭是以竊知乎文則洪氏子  
舉秀才前後勝負予得而度夫子黼黻之性加好勤苦之節紡績  
墳典組織篇什觀經緯機杼則重錦繡段日日當成今年秋貢士  
果居首薦歌鹿鳴以飲餞想鵬搏而飭駕金欲求鍛玉將就磨光  
鉅穎耀朝夕以冀迴雁賓海秋風落山雖難別離向處無恨中鵠  
餘矢猶思再發升冬元月期會於闕下

歐陽詹送洪儒  
卿赴鄉舉序

貢士有宴我牧席公新禮也貞元癸酉歲邑有秀士八人公將首  
薦於闕下古者相覲相祖有享有宴享以昭恭儉宴以示慈惠二  
典爲用鮮或克兼諸侯升俊造於天子遣之日唯行鄉飲酒之禮

則享禮也。載肉元酒，莫飲莫食。公念肉不使食，則仁不下。挾酒不使飲，則歡不上。交方欲激，邦俗於流，醑致王人，乎德行而賢者仁。未伊浹才者，歡未我交。其若蚩蚩，何秋七月，與八人者鄉飲之禮。既修，乃加之以宴餼，移已膳醴，出家醢求絲桐匏竹以將之。選華軒勝境以光之後。一日，遂有東湖亭之會。公削桑梓之禮，執賓主之儀，揖讓升堂，雍容就筵，樂遍作而情性不流，爵無算而儀形有肅。鏘鏘焉濟濟焉，於是老幼來窺，盡室盈歧，非其親懿，則其閭里皆內訟而誓遷善焉。於戲，行其教不必耳提而口授，移其風不必門扇而戶吹。公斯宴，則風移教行，其間矣。真盡心竭誠奉主化民。

之宰也煙景未暮酒德俱飽有逡巡避位而言曰夫詩者有以美  
盛德之形容君侯因片善附小能迴一邑之心成一邑之行而昭  
吾人恭儉於嘉享示吾人慈惠於清宴迴人心成人行周孔之才  
也昭恭儉示慈惠管晏之賢也不有歌詠其如六義何是日人有  
甘棠類宮之什客有天水姜閔河東裴參和潁川陳詡邑人濟陽  
蔡沼佐贊盛事亦獻雅章小子公之毗幸鼓微聲先八人者鳴捧  
豆伺徹時在公之側覩眾君子之作遂從卜商之後書其旨爲首  
序

歐陽詹泉州刺史席公晏邑  
中赴舉秀才於東湖亭序

澤宮送士歲貢也晉昌唐如晦以信誼爲良弓文學爲敢矢規箒

祿猶眾禽密殼持滿溯風蜚繳者數矣有措栝之妙而無雙鶻之獲報弓收視歸究其術絲是跡愈屈而名愈聞君子益多之彼不由其術一幸而中者雖懸貆在庭君子未嘗多也歲殫矣告予以西余爲賦澤宮一章庶見子之弓弗再張也已

劉禹錫澤宮詩引

來書所謂浮豔聲病之文恥不爲也雖誠可恥但慮足下方今不爾且不能自信其言也何者足下舉進士舉進士者有司高張科格每歲聚者試之其所取迺足下所不爲者也工欲善其事必先利其器足下方伐柯而捨其斧可乎恥之不當求也求而恥之惑也今吾子求之矣是徒涉而恥濡足也甯能自信其言哉來書所

謂汲汲於立法甯人者迺在位者之事聖人得勢所施爲也非詩賦之任也功旣成澤旣流詠歌紀述光揚之作作焉聖人不得勢方以文詞行於後今吾子始學未仕而急其事亦太早計矣

皇甫湜答

李生第

一書

生以一詩一賦爲非文章抑不知一之少便非文章卽直詩賦不是文章卽如詩賦非文章三百篇可燒矣如少非文章湯之盤銘是何物也孔子曰先行其言旣爲甲賦矣不得稱不作聲病文也孔子曰必也正名乎生旣不以一第爲事不當以進士冠姓名也夫煥乎郁郁乎之文謂制度非止文詞也前者捧卷軸而來又以

浮豔聲病爲說似商量文詞當與制度之文異日言也近風教倫  
薄進士尤甚迺至有一謙三十年之說爭爲虛張以相高自謾詩  
未有劉長卿一句已呼阮籍爲老兵矣筆語未有駱賓王一字已  
罵宋玉爲罪人矣書字未識偏傍高談稷契讀書未知句度下視  
服鄭此時之大病所當嫉者生美才勿似之也

皇甫湜答李  
生第二書

始湜於江陵望見王膠而異之知其爲膠又說其膠名之不凡然  
未之諭不忍而問諸膠乃稱曰膠之爲言猶牢固也膠痛今之人  
其始之心以利回其始之交以利還將固吾初心與吾交勿以利  
還將固吾心與吾交猶懼醉睡病昏之時忽然而忘故以膠自名

欲吾造次顛沛起居意問記吾心守與交也膠以進士舉進士尤  
輕其流懼混然與之化懼書紳銘坐之忘疏故以膠白名其始望  
見膠而異之又悅其名而爲之交又悅其言誠其意耳又悅其與  
吾業同遂大悅之徵其文學乃出累百篇其歌詩高處用古人其  
錄述詞壯而有奇然後吾與膠見其才之全其爲人之誠也今侍  
郎韓公余之舊知將薦膠而未具於西行敘以先之

皇甫湜送  
王膠序

廬山自陶謝洎十八賢已遺儒風綿綿相續不絕貞元初有符載  
楊衡輩隱焉亦出爲文人今其讀書屬文結草廬於巖谷閒者猶  
一二十人卽其中秀出者有彭城人劉軻軻開卷慕孟子爲人軻



秉筆燕揚雄司馬遷爲文故著翼孟三卷象龍子十卷雜文百餘  
篇而聖人之旨作者之風雖未臻極往往而得子佐潯陽郡三年  
軻每著文輒來示余予知軻志不息異日必能跨符楊而攀陶謝  
軻一旦盡賣所著書及所爲文訪予告行欲舉進士予方淪落江  
海不足以發軻事業又羸病無心力不能編致書於臺省故人因  
援紙引筆寫胸中事授軻且曰子到長安持此札爲子謁集賢庚  
三十二補闕翰林杜十四拾遺金部元八員外監察牛二侍御秘  
書蕭正字藍田楊主簿兄弟彼七八君子皆予文友以子愚直嘗  
信其言苟於今不我欺則子之道庶幾光明矣又欲使平生故人

知我形體已悴志氣已憊獨好善喜才之心未死去矣持此代書

三月三日樂天白

白居易代書

古之取士得明經爲清選近世卽爲進士亞之叔父獨謂古道可恃乃曰我儒世家也當勤經策義取高第耳業之三貢果得中遂理橐言歸亟思以賀爲高堂之壽嗟乎斯古孝廉之職叔父盡之無媿耳及東出都命諸子亞之譔序詩以贊行云

沈亞之送叔父歸觀序

前陸掾來得韶卿書知韶卿欲屈道以從人求京兆解送知韶卿道在與否固不在首解於京兆也愚嘗謂與遊者道韶卿庸未雞髮未鶴然其心甚老脫一旦脅肩低眉與諸子爭甲乙於縣官豈

愚所謂甚老者邪韶卿曾不是思也愚所謂首出者謂四科首顏  
閔三十世家首太伯七十列傳首伯夷其爲首出豈不多邪韶卿  
不首於是而欲首於何哉僕又聞京兆等試試官知與否脫有知  
韶卿人聞烏有不心躬嘿禮靈冠統以待之邪夫然亦何害小伸  
於知己耳不然則東國繼臣西山俄夫微仲尼何傷爲殷季伯夷  
矣韶卿獨不見既得者邪豈盡爲顏子太伯伯夷然幸韶卿熟思  
之無以予不食太牢爲不知味者也前月中兩寄狀計必有一達  
者過重陽當決策東去計韶卿無以予身遠而不予思也勉矣自

愛策名春官後當會我於真山

劉軻重與  
陸賓虞書

自去歲前五年執事者上言云科第之選宜與寒士凡爲子弟議不可進熟於上耳固於上心上持下執堅如金石爲子弟者魚潛鼠遁無入仕路某竊惑之科第之設聖祖神宗所以選賢才也豈計子弟與寒士也古之急於士者取盜取讐取於夷狄豈計其所由來況國家設取士之科而使子弟不得由之若以科第之徒浮華輕薄不可任以爲治則國朝自房梁公已降有大功立大節率多科第人也若以子弟生於膏粱不知理道不可與美名不令得美仕則自堯已降聖人賢人率多于弟凡此數者進退取捨無所依據某所以憤懣而不曉也堯天子子也禹公子也文王諸侯孫

與子也武王文王子也周公文王之子武王之弟也夫子夫子裔  
孫宋公六代大夫子也春秋時列國有其社稷各數百年其良臣  
多出於公族及卿大夫子孫也魯之季友季文子叔孫穆子叔孫  
昭子孟獻子皆出於三桓也臧文仲武仲出於公子彊柳下惠出  
於公子無駭宋之良臣多出於戴桓武莊之族也舉其尤者華元  
子罕向戌是也衛之良臣亦公族及卿大夫之裔也舉其尤者公  
子荆公叔發公子朝皆公族也子鮮公子也史狗史魚甯武子卿  
大夫之裔也齊之晏嬰晏桓子子也曹之子臧公子也吳之季札  
王子也鄭之良臣皆公孫公族也舉其尤者子封子良子罕子展

子皮子產子張子太叔是也楚之良臣子囊子西子期皆王子也  
子庚王孫也其卿大夫之裔鬬氏生令尹子文後有鬬辛鬬巢鬬  
懷薦氏生薦賈孫叔敖薳啟疆薳子憑薳掩薳罷屈氏生屈蕩屈  
到屈建六國時有昭奚恤公族也屈原諸屈後也皆其祖先於武  
王文王時基楚國爲霸者用其子孫其社稷垂九百餘年至於晉  
國最爲強其賢臣尤多有趙氏魏氏韓氏狐氏中行氏范氏荀氏  
羊舌氏欒氏郤氏祁氏其先皆武公獻公文公勤勞臣也用其子  
弟召諸侯而盟之者僅三百年在六國齊之孟嘗趙之平原魏之  
信陵皆王子王孫也齊復有司馬穰苴亦王族也其在漢魏已下

至於國朝公族之子弟卿大夫之胄裔書於史氏爲偉人者不可勝數不知論聖賢才能于子弟中復何如也言科第浮華輕薄不可任用則國朝房梁公元齡進士也相太宗凡二十一年爲唐宗臣比之伊呂周召者郝公處俊亦進士也爲宰相時高宗欲遜位與武后處俊曰天下者高祖太宗之天下非陛下之有但可傳之子孫不可私以與后高宗因止來濟上官儀李元義皆進士也後爲宰相濟助長孫太尉褚河南共摧武后者後突厥入塞免胄戰死儀革廢武后召元義助處俊言不可以位與武后妻侍中師德亦進士也吐蕃強盛爲監察御史以紅抹額應猛士詔躬衣皮袴

率土屯田積穀八百萬石二十四年西征兵不乏食薦狄公爲相  
取中宗於房陵立爲太子漢陽王張公柬之亦進士也年八十爲  
相致致四王手提社稷上還中宗郭代公元振亦進士也鎮涼州  
僅十五年北卻突厥西走吐蕃制地一萬里握兵三十萬武氏惕  
息不敢移唐社稷魏公知古亦進士也爲宰相廢太平公主謀以  
佐元宗及卒也宋開府哭之曰叔向古之遺直子產古之遺愛兼  
而有者其魏公乎姚梁公元崇登第下筆成章舉首佐元宗起中  
興業凡三十年天下幾無一人之獄宋開府璟亦進士也與姚喆  
和致開元太平者劉幽求登制策科與元宗徒步誅韋氏立睿宗



者蘇氏父子皆進士也大許公爲相於武后朝酷吏中不失其正  
於中宗朝誅反賊鄭普思於韋后黨中小許公佐元宗朝號爲蘇  
宋張燕公說登制策科排張易之兄弟贊睿宗請元宗監國竟誅  
太平公主招置文學士開內學館元宗好書尙古封中太山祀后  
土因燕公也張曲江九齡亦進士也排李林甫牛仙客罵張守珪  
不斬安祿山謫老南服年未七十張巡亦進士也凡三人判等以  
兵九千守睢陽城凡周歲拒賊十三萬兵使賊不能東進尺寸以  
全江淮元和中宰相河東司空公中書令裴公皆進士也裴公仍  
再得宏辭制策科當貞元時河北叛齊蔡亦叛階此蜀亦叛吳亦

叛其他未叛者皆高下其目熟視朝廷希嚮強弱而施其所爲司空公始相憲宗廢權倖之機牙令不得張收斂百職歸於有司命節度使出朝廷不由兵士拔取沈滯各還其官然後西取蜀東取吳天下仰首始見白日裴公撫安魏博使田氏盡歸六州元和中剪蔡劇賊於洛師脅下招來常山質其二子以累其心取十三城使不得與齊交手爲寇因誅師道河南盡平當是時天下幾至於太平凡此十九公皆國家興之存亡安危治亂者也不知科第之選復何如也至于智效一官忠立一節德行文學不可悉數董生云春秋之義變古則譏之傳說命高宗曰監於先王成憲其永無

愆故殷道復興鴻雁美周宣王能復先王之道西漢魏相佐漢宣  
帝爲中興但能奉行漢家故事姚梁公佐元宗亦以務舉貞觀之  
法制耳自古及今未有背本棄古而能致治者昨獲覽三郎秀才  
新文凡十篇數日在手讀之不倦其旨意所尙皆本仁義而歸忠  
信加以辭彩適茂皎無塵土況有誠明長厚之譽於千人中儻使  
前五六年得進士第今可以出入諫官御史助明天子爲治矣古  
人云三月不仕則相弔安有凡五六年來選取進士施設網罟如  
防盜賊言子弟者噫啞抑鬱思一解布衣與下士齒厥路無由於  
古未前聞也某因覽三郎文章不覺發憤略言大槩干觸尊重無

任惶懼

杜牧上宣州  
高大夫書

治心治身治友三者治矣有求名而名不隨者未之聞也治心莫若和平治身莫若兢謹治友莫若誠信友治矣非身治而不能得之身治矣非心治而不能致之三者治矣推而廣之可以治天下惡有求成進士名者而不得也況有千人皆以聖人爲師眠而食一無其他唯議論是司三人有私十人公私半百人無有不公者況千人哉古之聖賢業大事鉅道行則不肖懼道不行則不肖喜故有不公今進士者業微事細如成其名不肖未所喜懼甯不公耶故取之甚易耳廬生客居於饒年十七八卽主一家骨肉之饑

寒常與一僕東泛滄海北至單于府丐得百錢尺帛囊而聚之使其僕負以歸饒之士皆憐之能辭明敏而知所去就年末三十嘗三舉進士以業丐資家近中輟之去歲九月余白池改睦凡同舟

杜牧送盧

秀才赴舉序

夫物不得以時而發其發必熾風行溪谷颺颺習習卽不得遂作必颺忽源泉混混然隄防陂畜波扶壅缺亦不可遏其於人也亦然潁川陳君學積乎勤藝高乎專喪家途歎志用不通鬱然而居者有年矣累爲運帥賓禮貢之天子齋咨暗鳴輒以窮盡今年稍

始克偕計吏屢勉上道久憤湮鬱一旦決發若風波之得宣洩吁  
可當邪名光耀乎天庭聲飛馳乎海浦其在此行矣然君子學道  
以循祿端已以售道不肯枉尺以靳尋直況突梯滑稽以苟得與  
君其勉之樵弱弓蓬矢難以妄發徒善君之引滿強勁指期命中  
於行不能無述

孫樵送陳生  
舉進士序

禹畫九州列貢輕重舉賢用才咸在其中故周官司馬得俊造之  
名乃進於天子謂之進士又天子於射宮以擇諸侯所貢之士若  
善者乃受上賞不善者黜爵其次削地得預於射宮以射諸侯之  
義而爲諸侯所舉者重所用者大漢法每州若干戶歲貢若干人

更以籍上聞計州縣之大小材之多少謹之計籍人主親試所通  
經業策問理優深者乃中高第有行著鄉里辟選自古而然漢世  
得人於斯爲盛國家武德初令天下冬季集貢士於京師天子制  
策考其功業辭藝謂之進士已廢於行實矣其後以郎官權輕移  
之於禮部大率以三場爲試初以詞賦謂之雜文復對所通經義  
終以時務爲策目雖行此擢第又不由於文藝矣唯王公子弟器  
貌奇偉無才無藝者亦冠於多士之首然相士之道備嘗聞之有  
門閥清貴者有狀骨卿相者有容質秀麗者有才藻可尙者有權  
勢抑取者有朋友力盛者機權沈密詞辨雄壯臧否由己昇沈在

心羣眾必集其門若見公相來交請友識面爲難動必有應遊必有從密處隱會深誠重約朱門甲第之間鬼神不能知者盡知之雖名臣碩德高位重權可以開闔之可以搖動之可以傾覆之有司畏之不敢不與之者言泉疾於波浪舌端利若鋒鋸所排歿九泉所引昇霄漢默默無言眾必謂之長者發中心病時皆目之冤人秋風八月鞍馬九衢神氣揚揚行者避路視富貴若咳唾視州縣如奴僕亦不獨高於貴胄亦不賤彼孤介得其術者捨耒耜而取公卿乖其道者抱文章而成痼疾朝廷取士之門於斯爲最衰世以來多非其人明廷無策問之科有司亡至公之道登第之人



其辭賦皆取能者之作以玉易石羊質虎皮闕抱憤之人汨沒塵

土天九重高不可以叫加以浮薄之子遞相唱和名第之中以隻  
數爲上賤其雙數以甲乙爲貴輕彼兩科題目之閒增其異名至  
於傅粉熏香服飾鞍馬之費多致匪人成於牧宰取資貨以利輕  
肥朋黨比周交遊酒食亂其國政於斯爲盛竊願明君賢臣悉力  
同心大革其弊復以經明行修爲急所謂斥彼浮華敦其茂實儒  
風免墜不失取士之道

牛希濟  
貢士論

君子所以章灼當時焜耀來裔者必曰進士擢第畿尉釋褐斯道  
也中朝令法雖百王不移者也自聖歷中興百度漸貞能興此美

者今始見張郭二生矣則知九仞之勢千里之行凝雲逐日未可  
量也鉉也不佞生於先賢之後進在二子之前此美不兼可以嘆  
息然有事同而時異請試論之噫詞場墜廢五十年矣故老之言  
議殆絕後生之視聽懵然今百辟有司達於郡國吏徒見趨走公  
府中一尉耳焉知其餘哉而二君子調高才逸年少氣盛將以俊  
造之業自重責人以既廢之禮又將以堯舜之道爲用議政於俗  
吏之間如是將與時大乖矣嗚呼彼眾我寡或者難以勝乎君子  
之道無施不可舒之彌四海卷之在掌握日碑見奇於牧馬陽元  
知名於水磴彼二人卽公輔大器也豈以恥辱爲累哉愚願二君

子反己正身開懷戢耀無望人以不知無強人以不能如斯而已  
矣今天子重文好古諸生懷才待用所以蒼生未蒙福者上下之  
勢殊中有聞耳大易之義物不終否否極必泰泰之時在上者其  
道下降在下者其道上行君臣相合然後事業遠矣吾以爲斯道  
之復不遠吾子其勉之句曲仙鄉廣陵勝地多難將弭春物將華  
琴棋詩酒足以爲適贈言之旨盡於斯焉

徐鉉送張億郭  
貢二先輩序

登科記考卷三十

大興徐松

別錄下

鴻鵠振羽翩翩飛入帝鄉朝鳴集銀樹暝宿下金塘日月天門近

風煙夜路長自憐窮浦雁歲歲不隨陽

劉希夷餞李秀才赴舉

太清間海鶴遊子引鄉盼聲隨羽儀遠勢與歸雲便青桂春再榮

白雲暮來變遷飛在禮儀豈復淚如霰

王昌齡送劉沅虛歸取宏詞解

自從歸楚客不復掃荆扉劍共丹誠在書隨白髮歸舊游經亂靜

後進識君稀空把相如賦何人薦禮闈

劉長卿送馬秀才移家京洛便赴舉

故人西奉使胡騎正紛紛舊國無來信春江獨送君五言凌白雪

六翮向青雲誰念滄洲吏忘機鷗鳥羣

劉長卿送路少府使東京便應制舉

適賀一枝新旋驚萬里分禮闈稱獨步太學許能文征馬望春草

行人看暮雲遙知倚門處江樹正氛氲

劉長卿送孫瑩京監擢第歸蜀觀省

吾觀鷁鷁賦君負王佐才惜無金張拔十上空歸來棄置鄉園老

翻飛羽翼推故人今在位歧路莫遲回

孟浩然送丁鳳進士赴舉呈張九齡

十五綵衣年承歡慈母前孝廉因歲貢懷橘向秦川四座推文舉

中郎許仲宣泛舟江上別誰不仰神仙

孟浩然送張參明經舉兼向涇州觀省

獻策金門去承歡綵服違以吾一日長念爾聚星稀昏定須溫席

寒多未授衣桂枝如已擢早逐雁南飛

孟浩然送洗然弟進士舉

魯客向西笑君門若夢中霜凋逐臣髮日憶明光宮復羨二龍去  
才華冠世雄平衢騁高足逸翰凌長風舞袖拂秋月歌筵聞蚤鴻  
送君日千里良會何由同

李白魯中送二從弟赴舉之西京

秀才何翩翩王許同也賢暫別廬江守將遊京兆天秋山宜落日

秀水出寒煙欲折一枝桂還來雁沼前

李白同吳王送杜秀芝赴舉入京

明經有清秩當在石渠中獨往宣城郡高齋謁謝公寒原正蕪漫

夕鳥自西東秋日不堪別淒淒多朔風

韋應物送五經趙隨登科授廣德尉

建業控京口金陵欵滄溟君家臨秦淮傍對石頭城十年自勤學

一鼓遊上京青春登甲科動地聞香名解楊皆五侯結交盡羣英

按羣英一作時英

六月槐花飛忽思尊榮跨馬出國門丹陽返柴荆楚

雲引歸帆淮水浮客程到家拜親時入門有光榮鄉人盡來賀置

酒相邀迎閑眺北顧樓醉眠湖上亭月從海門出照見茅山青昔

爲帝王州今幸天地平五朝變人世千載空江聲元元告靈符丹

洞獲其銘皇帝受玉冊羣臣羅天庭喜氣溥太陽祥光徹宵冥奔

走朝萬國崩騰集百靈王兄尙謫宦屢見秋雲生孤城帶後湖心

與湖水清一縣無諍辭有時開道經黃鶴垂兩翅徘徊但悲鳴按

悲鳴一作悲旦鳴

相思不可見空望牛女星

岑參送許子擢第歸江甯拜親因寄王昌齡

井上桐葉赤灞亭卷秋風故人適戰勝走馬歸山東問君今年按

君

今年一作  
君如今

三十幾能使香名滿人耳君不見三峰直上五千仞見

君文章亦如此如君兄弟天下稀雄辭健筆皆若飛將軍金印彈

紫綬御史鐵冠重繡衣喬生作尉別來久因君爲問平安否魏侯

校理復何如前日人來不得書陸渾山下

按山下一作山水

佳可賞蓬閣

閒時日應往自料青雲未有期誰知白髮偏能長壚頭青絲白玉

瓶別時相顧酒如傾

一作酒初醒

搖鞭舉袂忽不見千樹萬樹空蟬鳴

岑參送魏叔虹擢第歸東都因懷魏校書陸渾喬潭

槐葉蒼蒼柳葉黃秋高八月天欲霜青門百壺送韓侯白雲千里

連高邱北堂倚門望君憶東歸扇枕後秋色洛陽才子能幾人明



年桂枝是君得

岑參送韓巽入都親省便赴舉

當年最稱意數子不如君戰勝時偏許名高人共聞半天城北雨

斜日灞西雲科斗皆成字無令錯古文

岑參送王伯倫應制授正字歸

巴江秋月新閣道發征輪戰勝眞才子名高動世人工文能似舅

擢第去榮親十月天官待應須早赴秦

岑參送嚴訢擢第歸蜀

時輩似君稀青春戰勝歸名登却說第身著老萊衣稱意人皆羨

還家馬若飛一枝誰不折棣萼獨相輝

岑參送薛彥偉擢第東歸

去馬疾如飛看君戰勝歸新登却說第更著老萊衣漢水行人少

巴山客舍稀向南風候暖臘月見春輝

岑參送蒲秀才擢第歸蜀

送爾姑蘇客滄波秋正涼橘懷三箇去桂折一枝將湖上山當舍

天邊水是鄉江村人事少時作捕魚郎

岑參送滕亢擢  
第歸蘇州拜親

嚶官就賓薦時輩詎爭先盛業推儒行高科獨少年迎秋見衰葉

餘照逐鳴蟬舊里三峰下開門古縣前

李嘉祐送嚴  
二擢第東歸

清秀過終童攜書訪老翁以吾爲世舊憐爾繼家風淮岸經霜柳

開城帶月鴻春歸定得意花送到東中

李嘉祐送張惟  
儉秀才入舉

當年貴得意文字各爭名齊唱陽春曲唯君金玉聲懸黎寶中出

高價世難掩鴻羽不低飛龍津徒自險直矜鸚鵡賦不貴芳桂枝

少俊蔡邕許長鳴唐舉知梁城下熊軾朱戟何暉耀才子欲歸甯

棠花已含笑高門知慶大子孝覺親榮獨攬還珠美甯惟問絹情  
離筵不盡醉摻袂一何早馬蹄西別輕樹色東看好行塵忽不見

惆悵青門道

錢起送李四  
擢第歸覲省

湖山不可厭東望有餘情片玉登科後孤舟任興行月中嚴子瀨

花際楚王城歲暮雲皋鶴聞天更一鳴

錢起送虞說  
擢第東遊

南風起別袂心到衡湘間歸客楚山遠孤舟雲水閑愛君採蓮處

花島連家山得意且甯省人生難此還

錢起送虞說擢  
第南歸覲省

林表吳山色詩人思不忘向家流水便懷橘綵衣香滿酌留歸騎

前程未夕陽愴茲江海去誰惜杜蘅芳

錢起送褚操擢  
第歸吳覲省

行人臨水去新詠復新悲萬里高秋月孤山遠別時掛帆嚴子瀨

酬酒敬亭祠歲晏無芳杜如何寄所思

錢起送楊暉  
擢第歸江南

多才白華子初擅桂枝名嘉慶送歸客新秋帶雨行離人背水去

喜鶴近家迎別贈難爲此衰年畏後生

錢起送鄭巨  
及第後歸觀

幾年深道要一舉過賢關名與元珠出鄉宜畫錦還運舟同宿浦

柳岸向家山欲見甯親孝儒衣稚子斑

錢起送李棲桐道  
舉擢第還鄉省侍

大學三年聞琢玉東堂一舉早成名借問還家何處好玉人含笑

下機迎

錢起送張參  
及第還家

西去意如何知隨貢士科吟詩向月路驅馬出煙蘿晚色寒蕪遠

秋聲候雁多自憐歸未得相送一勞歌

皇甫曾送鄭秀才貢舉

儒衣羞此別去抵漢公卿賓貢年猶少篇章藝已成臨流惜暮景

話別起鄉情離酌不辭醉西江春草生

皇甫曾送裴秀才貢舉

鄰家不識鬪雞翁閉戶能齊隱者風顧步曾爲小山客成名因事

大江公一身千里寒蕪上單馬重裘臘月中寂寂故園行見在暮

天殘雪洛城東

韓翃送王府張參軍附學及第東歸

充賦名今遂安親事不違甲科文比玉歸路錦爲衣海運同鷗化

風帆若鳥飛知君到三逕松菊有光輝

獨孤及送虞秀才擢第歸長沙

入貢列諸生詩書業早成家承孔聖後身有魯儒名楚水通滎浦

春山擁漢京愛君方弱冠爲賦少年行

皇甫冉送孔黨赴舉

公車待詔赴長安客裏新正阻舊歡遲日未能銷野雪晴花偏自

犯江寒東溟道路通秦塞北關威儀識漢官共許却就工射策恩

榮請向一枝看

皇甫冉送錢唐路少府赴制舉

寂寞柴門掩經過柱史榮老夫甯有力半子自成名柳映三橋發

花連上道明檄書到別墅郢曲果先成

嚴維酬謝侍御喜王字及第見賀不遇之作

鄱陽中酒地楚老獨醒年芳桂君應折沈灰我不然洛橋浮逆水

關樹接非煙唯有殘生夢猶能到日邊

顧況送韋秀才赴舉

鄉賦鹿鳴篇君爲貢士先新經夢筆夜纔比棄繻年海雨沾隋柳

江湖赴楚船相看南去雁離恨倍潸然

耿漳送郭秀才赴舉

洛水橋邊雁影疏陸機兄弟駐行車欲陳漢帝登封草猶待蕭郎

寄內書

李益中橋北送穆質兄弟應制獻贈蕭策

年少通經學登科尙佩觿張馮本名士蔡廓是佳兒鞍馬臨歧路

龍鍾對別離寄書胡太守清與故人知

司空曙送王使君小子孝廉登科歸省

見誦甘泉賦心期折桂歸鳳雛皆五色鴻漸又雙飛別思看衰柳

秋風動客衣明朝問禮處暫覺雁行稀

劉商送李元規昆季赴舉

秋色生邊思送君西入關草衰空大野葉落露青山故國煙霞外

新安道路間碧霄知己在香桂月中攀

冷朝陽送唐六赴舉

隋堤望楚國江上一歸人綠氣千樹暮青風萬里春試才初得桂

泊渚肯傷別拜手終悽愴恭承中外親

李端送楊舉作舉擢第歸江東

聖朝殊漢令才子少登科每見先鳴早常驚後進多獨居方寂寞

相對覺蹉跎不是通家舊頻勞文舉過

李端贈趙神童

長長南山松短短北欄楊俱承日月照幸免斤斧傷去年與子別

誠言暫還鄉如何棄我去天路忽騰驤誰謂有雙目識貌不識腸

豈知心內乖著我薜蘿裳尋君向前事不歎今異翔往往空室中

寤寐說珪璋十年居此溪松桂日蒼蒼自從無佳人山中不輝光

盡棄所留藥亦焚舊草堂還君誓已書歸我學仙方既爲參與辰



各願不相望始終名利途慎勿罹咎殃

王建山中寄及第故人

四海重貢獻珠寶稱至珍聖朝開禮闈所貴集嘉賓若生在世間  
此路出常倫一士登甲科九族光彩新憧憧車馬徒爭路長安塵  
萬目視高天昇者得苦辛況子常少年丈人在咸秦出門見宮闕  
獻賦侍朱輪有賢大國豐無子一家貧男兒富邦家豈爲策其身  
煌煌文明代俱幸生此辰自顧非國風難以合聖人子去東堂上  
我歸南澗濱願君勤作書與我山中鄰

王建送薛  
夢應舉

杏花壇上授書時不廢中庭趁蝶飛暗寫五經收部帙初年七歲  
著衫衣秋堂白髮先生別古卷青襟舊伴歸獨向鳳城持薦表萬

人叢裏有光輝

王建送司空神童

客路商山外離筵小暑前高文常獨步折桂及韶年關國通秦限

波濤隔漢川叨同會府選分手倍依然

武元衡送魏正則擢第歸江陵

商山路接玉山深古木蒼然盡合陰會府登筵君最少江城秋至

肯驚心

武元衡送魏正則擢第歸江陵

馬蹄聲特去入天子國借問去是誰秀才皇甫提吞吐一腹文

八音兼五色主文有崔李郁郁爲朝德青銅鏡必明朱絲繩必直

稱意太平年願子長相憶

馬異送皇甫提赴舉

貢士去翩翩如君最少年綵衣行不廢儒服代相傳曉月經淮路

繁陰過楚天清談遇知己應訪孝廉船

權德輿送韓孝廉侍從赴舉

儒衣風貌清去抵漢公卿賓貢年猶少篇章藝已成臨流惜暮景

話別起鄉情離酌不辭醉西江春草生

權德輿送裴秀才貢舉

衛多君子魯多儒七歲聞天笑舞雩光彩春風初轉蕙性靈秋水

不藏珠兩經在口知名小百拜垂髫稟氣殊況復元侯旌爾善桂

林枝上得鴻雛

楊巨源送司徒童子

春色華陽國秦人此別離驛樓橫水影鄉路入花枝日暖鶯飛好

山晴馬去遲劍門當石隘棧閣入雲危獨鶴心千里貧交酒一卮

桂條攀偃蹇蘭葉藉參差旅夢驚蝴蝶殘芳怨子規碧霄今夜月

惆悵上峨嵋

陳羽西蜀送許中庸歸秦赴舉

五陵春色泛花枝  
心醉花前遠別離

落羽王荆公百恥爲關家詩選作落第

右客成名空羨里  
中兒都門雨歇愁  
分處山店燈殘夢  
到時家住

洞庭多釣伴  
因來相賀話相思

陳羽送友人及第歸江東

月沒天欲明  
秋河尙疑白  
皚皚積光素  
耿耿橫虛碧  
南斗接北辰

連空濛鴻洞  
浮高天  
蕩蕩漫漫皆  
晶然  
實類平蕪流  
大川  
星爲潭

底珠雲是波  
中煙雞唱漏  
盡東方作曲  
渚蒼蒼曉霜  
落雁叫疑從

清淺驚鳬聲  
似在沿洄泊  
并州紉侯直  
下孫才應秋  
賦懷金門念

排雲漢將飛  
翻仰之騁躍  
當華軒夜來  
陪餞歐陽子  
偶坐通宵見

深旨心知慷慨日昭然前程心在青雲裏

歐陽詹賦得秋河曙耿耿送郭秀才應舉

驚禽一辭巢棲息無少安秋扇一離手流塵蔽霜軌故侶不可追  
涼風日已寒遠逢杜陵士別盡平生歡逐客無印綬楚江多芷蘭  
因居暇時遊長鋏不復彈閱書南軒齋絙瑟清夜闌萬境身外寂  
一杯腹中寬伊昔元宗朝冬卿冠鸞鵠肅移升內殿從容領儒冠  
游夏無措詞陽秋垂不刊至今羣玉府學者空縱觀世人希德門  
獨若攀峰巒之子尙明訓鏘如振琅玕一旦西上書斑衣拂征鞍  
荆臺宿暮雨漢水浮春瀾君門起天中多士如星攢煙霞復雙闕  
抃舞羅千官清漏滴銅壺仙厨下雕梁熒煌仰金榜錯落濡飛翰

相喚聞不聞

孟郊舟中喜遇從叔簡別後寄上  
時從叔初擢第歸江南郊不從行

長安車馬道高槐結浮陰下有名利人一人千萬心黃鵠多遠勢

滄溟無近潯怡怡靜退姿泠泠思歸吟菱唱忽生聽芸書迴望深

清風散言笑餘花綴衣襟獨恨魚鳥別一飛將一沈

孟郊感別送  
從叔校書簡

再登科  
東歸

風駕送舉人東方猶未明自謂出太早已有車馬行騎火高低影

街鼓參差聲可憐早朝者相看意氣生日出塵埃飛羣動互營營

營營各何求無非利與名而我常晏起虛住長安城春深官又滿

日有歸山情

白居易早送  
舉人入試

莫羨蓬萊鸞鶴侶道成羽翼自生身君看名在丹臺者盡是人間

修道人

白居易酬趙秀才  
贈新登科諸先輩

子有雄文藻思繁韶年射策向金門前隨鸞鶴登霄漢卻望風沙

走塞垣獨憶忘機陪出處自憐何力繼飛翻那堪兩地生離緒蓬

戶長局行旅喧

李逢吉送令  
狐秀才赴舉

顏子將才應四科料量時輩更誰過居然一片荆山玉可怕無人

是卞和

李涉送顏  
覺赴舉

自說軒皇息戰威萬方無復事戎衣卻教孫子藏兵法空把文章

向禮闈

李涉送孫  
堯夫赴舉

青門瑯蘭客推水誓風流名在鄉書貢心期月殿遊平沙大河急

細雨二陵秋感此添離恨年光不少留

鮑溶送王損之秀才赴舉

羅剎樓頭醉送君西入京秦吳無限地山水半分程海上煙霞濕

關中日月明登科舊鄉里當爲改嘉名

姚合送李秀才赴舉

重重吳越浙江潮刺史何門始得消五字州人唯有此四鄰風景

合相饒橘村籬落香潛度竹寺虛空翠自飄君去九衢須說我病

成疏嬾嬾趨朝

姚合送盛秀才赴舉

篇章動玉京陸葉滿前程舊國與僧別秋江罷釣行馬過隋代寺

檣出楚山城應近嵩陽宿潛聞瀑布聲

鄭巢送人赴舉



去住跡雖異愛憎情不同因君向帝里使我厭山中故友多朝客

新文盡國風藝精心更苦何患不成功

章孝標山中送進士劉蟾赴舉

登唐科第語唐音望日初生憶故林殷室夜眠燈火冷蠻樓朝泊

曉霞深風高一葉飛魚背潮淨三山出海心想把文章合夷樂蟠

桃花裏醉人參

章孝標送金可紀歸新羅

世路

關二

久嗟君進取身十年雖苦志萬里託何人處困非乖道

求名本爲親惟應

關二

意先與化龍鱗

朱慶餘送友人赴舉

野店正紛泊蘭蠶初引絲行人碧溪渡繫馬綠楊枝冉冉跡始去

悠悠心所期秋山念君別惆悵桂花時

杜牧句溪夏日送盧霽秀才歸王屋山將欲赴舉

故人別來面如雪一楊拂雲秋影中玉白花紅三百首五陵誰唱

與春風

杜牧送李羣玉赴舉

省事卻因多事力無心翻似有心來秋風郡閣殘花在別後何人

更一杯

杜牧送趙十二赴舉

長樂通聽上苑鐘綵衣稱慶桂香濃陸機始擬誇文賦不覺雲間

有士龍

李商隱贈孫綺新及第

此去幾般榮登科題足名無慙入南巷高價聳東京窗對高山碧

庭來洛水聲門前桃李樹一徑已陰成

劉得仁送高湘及弟後東歸親叔

句曲舊宅眞自產日月英旣燭嶽瀟氣安無神仙名松桂遇逸色

與君相送情

祝元膺送高遂赴舉

金榜前頭無是非  
平人分得一枝歸  
正憐日暖雲飄路  
何處宴迴

風滿衣門掩長淮心  
更遠渡連芳草馬  
如飛茂陵自笑猶  
多病空

有書齋在翠微

薛逢李先輩攜第東歸有贈送

千峰歸去舊林塘  
溪縣門前卽故鄉  
曾把桂誇春里巷  
重憐身稱

錦衣裳洲迷翠羽雲  
遮檻露濕紅蕉月  
滿廊就養舉朝人  
共羨清

資讓卻校書郎

趙嘏送陳嘏登第作尉歸覲

見君先得意希我命  
還通不道才堪竝  
多緣寢共同鶴鳴  
荒苑內

魚躍夜潮中若問家  
山路知連震澤東

顧非熊送友人及第歸蘇州

春月三改兔花枝成綠陰年光東流水浩歎傷羈心酌桂煙嶼晚  
鷓鴣江草深良圖一超忽萬恨空相尋上國刈翹楚才微甘陸沈  
無燈假貧女有淚沾牛衾衡岳三麒麟各振黃鍾音卿雲被文彩  
芳價搖詞林夫子芸閣英養鱗湘水潯晴沙踏蘭菊隱几富青岑  
明月洞庭上悠揚掛離襟停觴一搖筆聊寄生芻吟

李羣玉將離  
澧浦置酒野

興奉懷沈正字昆  
弟三人聯登高第

幾年辛苦與君同得喪悲歡盡是空猶喜故人先折桂自憐羈客  
尙飄蓬三春月照千山道十日夜開一夜風知有杏園無路入馬

前惆悵滿枝紅

溫庭筠春日將欲東歸  
寄新及第苗紳先輩

同家楚天南相識秦雲西古來懸孤義豈願于與妻攜手踐名場  
正遇公道開君榮我雖黜威恩同所懷有馬不復羸有奴不復飢  
滿岸秋草綠卻是還家時青門一瓢空分手去遲遲期君轍未平  
我車繼東歸

劉駕送友人  
擢第東歸

學古既到古反求鑒者難見詩未識君疑生建安前海畔豈無家  
終難成故山得失雖由命世途多險艱我皇追古風文柄付大賢  
此時如爲君果在甲科間晚達多早貴舉世咸爲然一夕顏卻少  
雖病心且安所居似清明冷甕起新煙高情懶行樂花盛僕馬前  
歸程不淹留指期到田園香醪四鄰熟霜橘千株繁肯憶長安夜

論詩風雪寒

劉駕送人  
登第東歸

相愛過已切相賀似身榮心達無前後神交共死生承家吾子事

登第世人情未有通儒術明時道不行

李頻喜友人  
厲馬南及第

因爲太學選志業微春闈首領諸生出先登上第歸一榮猶未已

具慶且應稀縱馬行青草臨歧脫白衣家遙楚國寄帆對漢山飛

知己盈華省看君再發機

李頻送太學吳  
康仁及第南歸

粉闌深鎖唱同人正是終南雪霽春閑繁長安千匹馬今朝似滅

六街塵

司空圖  
省試詩

豈易及歸榮辛勤致此名登車思往事迴首勉諸生路繞山光曉

帆通海氣清秋期卻閑坐林下聽江聲

張喬送友人及弟歸江南

都堂公試日詞翰獨超羣品秩台庭與篇章聖主聞鄉連三楚樹

縣對九華雲多少青門客臨歧共羨君

張喬送麗百篇之任青陽縣尉

東風日邊起草木一時春自笑中華路年年送遠人

張喬送人及弟歸海東

按張喬又有送賓貢金夷吾奉使歸本國詩則此及第者當卽金夷吾也

得水蛟龍失水魚此心相對兩何如敢辭今日須行卷猶喜他年

待薦書松桂也應情未改萍蓬爭奈跡還疏春風不見尋花伴遙

向青雲泥子虛

李山甫賀友人及第

腰劍囊書出戶遲壯心奇命兩相疑麻衣盡舉一雙手桂樹只生

三兩枝黃祖不憐鸚鵡客誌公偏賞麒麟兒叔牙愛我應相痛回

首天涯寄所思

李山甫赴舉別所知

鼓鼙聲裏尋詩禮戈戟林間入鎬京好事盡從難處得少年無向  
易中輕也知貴賤皆前定未見疏慵遂有成吾道近求稀後進善

開金日答公卿

李咸用送譚李廉赴舉

秋風昨夜滿瀟湘衰柳殘蟬思客腸早是亂來無勝事更堪江上  
掛離觴澄潭躍鯉搖輕浪落日飛鳧趁遠檣漁父不須探去意一

枝春裊月中央

李咸用送黃貢于赴舉

成名年少日就業聖人嘗擢桂誰相比簾金已不如東城送歸客



秋日待征車若到清潭畔備風變里間

方干送李恬及弟後還貝州

南行無俗侶秋雁與寒雲野趣自多懷鄉名人共聞吳山中路斷

潮水半江分此地登臨慣據情一送君

方干送王羽登科後歸江東

天遣相門延積慶今同太廟薦嘉賓柳條此日同誰折桂樹明年

爲爾春倚棹寒吟漁浦月垂鞭醉入鳳城塵由來不要文章得要

且文章出眾人

方干送弟子伍秀才赴舉

君辭舊里一年期藝至心身亦自知尊靈離人看北斗月寒驚鵲

繞南枝書迴冊市砧應絕棹出村潭菊未衰與爾相逢終不遠昨

聞祕監在台墀

方干送葉秀才赴舉兼呈呂少監

自古主司看薦士明年應是不參差須憑吉夢爲先兆必恐長才  
偶盛時北闕上書衝雪早西陵中酒趁潮遲郊說可要眞消息只  
向春前便得知

方干送王  
霖赴舉

用心精至自無疑千萬人中似汝稀上國纔將五字去全家便待  
一枝歸西陵柳路搖鞭盡北固潮程掛席飛想見明年榜前事當  
時分散著來衣

方干送吳  
彥融赴舉

御題百首思縱橫半日功夫舉世名羽翼便從吟後出珠璣續向  
筆頭生莫嫌黃綬官資小必料青雲道路平才子風流復年少無

愁高臥不公卿

方干贈  
孫百篇

聖世科名酬志業仙州秀色助神機梅真入仕提雄筆阮瑀從軍  
著綵衣晝寢不知山雪積春遊應趁夜潮歸相思莫訝音書晚鳥

去猶須疊日飛

方干寄台州孫從事百篇韜齋尉校

求仙不在鍊金丹輕舉由來別有門日晷未移三十刻風騷已及

四千言宏才尙遺居卑位公道何曾雪至冤斂板塵中無恨色應

緣利祿副晨昏

方干贈上虞胡少府百篇

相看不忍盡離觴五兩牽風速去檣遠驛新砧應弄月初程殘角

未吹霜越山直下分吳苑淮水橫流入楚鄉珍重鄰家好兄弟明

年祿位在何方

方干送緡陵王少府赴舉

萃鹿歌中別酒催粉閣星彩動昭回久經離亂心應破乍覩昇平  
眼漸開顧我昔年悲玉石憐君今日蘊風雷龍門盛事無因見費  
盡黃金老隗臺

羅隱送章  
碣赴舉

平楚干戈後田園失耦耕艱難登一第離亂省諸兄樹沒春江漲

人繁野渡晴閑來思學館猶夢雪窗明

鄭谷送太學顏  
明經及第東歸

苦辛垂二紀擢第卻霑裳春勝

闕九  
字

名登塔喜

醺宴爲花忙好事東歸日高槐蕊半黃

鄭谷賀進士  
駱用錫登第

習讀在前生僧談足可明還家雖解喜登第未知榮時果曾落賜

春闈不挂情燈前猶惡睡牀語讀書聲

鄭谷贈劉  
神童於鵬

得意卻思尋舊跡新街未切向蘭臺吟看秋草出關去逢見故人  
隨計來勝地昔年詩板在清歌幾處郡筵開江湖易有淹留興莫  
待春風落庾梅鄭谷送進士吳延保及第後南遊

丹霞照上三清路瑞錦裁成五色毫波恨不能隨世態鳳鸞應得  
入吾曹秋山晚水吟情遠雪竹風松醉格高預想明年騰躍處龍  
津春碧浸山桃鄭谷送進士韋序赴舉

孤吟望至公已老半生中不有同人達兼疑此道窮只應才自薄  
豈是命難通尙激搏溟勢期君借北風崔塗喜友人及第

歸捷中華第登船鬢未絲直應天上桂別有海東枝國界波窮處

鄉心日出時西風送君去莫慮到家遲

杜荀鶴送賓貢登第後歸海東

家林滄海東未曉日先紅作貢諸蕃別登科幾國同遠聲魚呷浪

層氣蜃迎風鄉俗稀攀桂爭來問月宮

張翥送友人及第歸新羅

十問九通離義牀今時登第信非常亦從南院看新榜旋束春闈

歸故鄉水到吳門方見海樹侵閩嶺漸無霜知君已塞平生願日

與交親醉幾場

黃滔送人明經及第東歸

兩篇佳句敵瓊瑰憐我三清道路開荆璞獻多還得售桂堂恩在

敢輕回花繁不怕尋香客榜到應傾賀喜杯知爾苦心功業就早

攜長策出山來

翁承贊喜弟承檢登科

門外報春榜喜君天子知舊愁渾似雪見日總消時塔下牡丹氣

江頭楊柳絲風光若有分無處不相宜

曹松覽春榜  
喜孫郛成名

桂枝博得鳳棲枝歡覲家僮舞翠微僧向瀑泉聲裡賀鳥穿仙掌

指間飛休停硯筆吟荒廟永別燈籠赴鎖闌騷雅近來顏喪甚送

君傍覺有光輝

李洞送郛先  
輩歸觀華陰

獻策赴招攜行宮積翠西挈囊秋卷重轉棧晚峰齊踏月趨金闕

拂雲看御題飛鳴豈回顧獨鶴困江泥

李洞龍州  
送人赴舉

未老鬢毛焦心歸向石橋指霞解二紀吟雪遇三朝連席頻登相

分廊尙祝堯迴眸舊行侶免使負蒿樵

李洞出山  
觀春榜

成名郊外掩柴扉樹影蟬聲共息機  
積雨暗封青蘚徑好風輕透

白練衣嘉魚始賦人爭誦荆玉頻收國自肥  
獨坐公廳正煩暑喜

吟新詠見元微

徐鉉和印先輩及第後獻座主朱舍人郊居之作

春闈鳥罷啼歸慶浙煙西郡守招延重鄉人  
慕仰齊橘青迷暑寺

茶長隔湖溪乘暇知高眺微應辨會稽

無可送邵錫及第歸湖州

漢豕招秀士峴上送君行萬里見秋色兩河傷遠情  
王師出西鎬

虜寇避東平天府登名後迴看楚水清

皎然峴山送裴秀才赴舉

春風洞庭路搖蕩暮天多衰疾見芳草別離傷遠波  
詩名推首薦

賦甲擬前科數日聞天府山衣製菱荷

皎然太湖館送殷秀才赴舉



名在諸生右家經見素風春田休學稼秋賦出儒宮別路殘雲溼

離情晚桂叢明年石渠署應繼叔孫通

皎然送張孝廉赴舉

諸侯懼削地選士皆不羈休隱脫荷菱將鳴矜羽儀甲科爭玉片

詩句擬花枝君實三楚秀承家有清規

皎然送陳秀才赴舉

豈謂江南別心如塞上行苦雲搖陣色亂木攬秋聲周谷雨未散

漢河流尚橫春司遲爾策方用靜妖兵

皎然送李少賓赴舉

回也曾言志明君則事之中興今若此須去更何疑志列秋霜好

忠言劇諫奇陸機遊洛日文舉薦衡時虎跡商山雪雲痕岳廟碑

夫君將潦倒一說向深知

賈休送高九經赴舉

冬暮雨霏霏行人喜可稀二階夜雪亞聖在春闈馬疾頑童遠

山荒凍葉飛闕師無一事應見麕龜歸賈休送黃賓于赴舉

年年屈復屈惆悵曲江湄自古身榮者多非年少時空盡投刺遠

大雪入關遲來歲還公道平人不用疑賈休送葉蒙赴舉

憶昨送君詩平人不用疑吾徒若不得天道即應私塵土茫茫曉

麟龍草草騎相思不可見又是落花時賈休聞葉蒙及第

主聖臣賢日求名莫等閑直須詩似玉不用力如山草白兵初息

年豐駕已還憑將安養意一說向曾顏賈休送陳秀才赴舉兼寄韓舍人

得桂爲邊辟翩翩頗合宜嫖姚留不住寶錦已歸遲島側花藏虎

湖心浪撼棹終朝華頂下其體淥身師

賈休送友人及第後歸台州

幾載阻兵荒一名終不忘還衝猛風雪如畫冷朝陽句好慵將出

囊空卻不忙明年公道日去去必穿楊

賈休送盧秀才應舉

見心知命好一別隔煙波世亂無全土君方掇大科早隨盤路轉

莫戀蜀山多必貢安時策忠言奈爾何

賈休聞友人駕前及第

兩河兵火後西笑見吾曹海靜三山出天空一鶚高賈居槐抄屋

行卷雪埋袍他日如相覓栽桃近海濤

賈休送鄭準赴舉

詩業務經綸新皆意外新四知登第勝不著不平人句得孤舟月

心飛九陌塵明年相賀日應到曲江濱

賈休送李劍赴舉

捧桂香如紫禁煙遠鄉程徹巨鼉邊莫言挂席飛連夜見說無風  
卽數年衣上日光眞是火島傍魚骨大於船到鄉必遇來王使與  
作唐書寄一篇

貫休送新羅人及第歸

九重方側席四海仰文明好把孤吟去便隨公道行梁園浮雪氣

汴水漲春聲此日登仙眾君應最後生

齊已送孫處秀才赴舉

分有爭忘得時來須出山白雲終許在清世莫空還驛樹秋聲健

行衣雨點斑明年從月裏滿握度春關

齊已送人赴舉

槐花館驛暮塵昏此去分明吏部孫才器合居科第首風流幸是

縉紳門春和洛水清無浪雪洗高峰碧斷根堪想都人齊指點列

仙相次上崑崙

齊已送韓蜕  
秀才赴舉

煙霄已遂明經第江漢重來問苦吟  
託興偶憑風月遠忘機終在  
寂寥深千篇未聽常徒口一字須防作者心  
此日與君聊話別老

身難約更相尋

齊已送吳  
先輩赴京

兩上東堂不見春文明重去有誰親  
曾逢少海尊前客舊是神仙  
會裏人已遂風雲催化羽卻將雷電助燒麟  
明年自此登龍後迴

首荆門一路塵

齊已送相里  
秀才赴舉

雲峰滿目放春晴歷歷銀鈎指下生  
自恨羅衣掩詩句舉頭空羨

榜中名

魚元機遊崇真觀南  
樓觀新及第題名處

南菁書院叢書